

Marcus Beer a «da cuminonza» a Ruschein

Igl'emprem hosp dad uonn ella retscha d'occurenzas cun il tetel «da cuminonza a Ruschein – la sera dils treis» ei il president communal d'Ilanz/Glion *Marcus Beer*. El ei en uffeci dapi 120 dis ed ha gia baul nudau en sia agenda quei termin da venderdis, ils 3 da mars 2023 a Ruschein. Tgi eis el? E co eisi stau per el da midar naven dil menaschi da scola el menaschi d'ina administraziun communal?

Dapi varga 30 onns ei Glion il liug da lavur da Marcus Beer. El ha dau scola en quei che se numna oz il CFS, Center da Formaziun Sur-selva. Leu eis el staus scolast da roms d'economia e lu era prorectur e pli tard menader dalla scola media mercantila. Habituau ha el denton tochen avon circa tschun onns ella Cadi e buc ella Foppa. El ha pia buca giu da decider avon diesch onns schebein el dueigi votar per ni encunter la fusiun. Ed ussa eis el president da



Marcus Beer,
president communal d'Ilanz/Glion.

FOTO MAD

quella vischnaunca fusiunada. Tgei ha motivau el da far cun varga 60 onns ina tala midada professiunala? Tgei fa plascher e tgei fa cavegls grischs ad el en siu niev uffeci? Tgei ha el «astgau» e tgei ha el «stuiu» emprendre ils emprems quater meins sco president communal? Quellas ed autras damondas – era dil publicum – empermettan ina sera informativa ed interessanta e speranza era intec diverteivla. Beinvegnidas ein sco adina era persunas d'ordeifer. E suenter l'occurrenza vegn offeriu in sitg – aua ni vin.

Maria Cadruvi, Ruschein

Ina sentupada cun Marcus Beer: Venderdis, ils 3 da mars 2023 allas 20.15, Casa da scola Crestas, Ruschein. Dapli sin www.dacuminonza.ch.